

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
OPĆINSKO VIJEĆE



Broj: 01-05-1054/19-AP-16

Datum: 04.12.2019. godine

Na osnovu člana VI. 2. Ustava Federacije Bosne i Hercegovine, člana 13. stav 1. alineja 1. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06 i 51/09), člana 25., 126. i 127. Statuta Općine Zavidovići („Službeni glasnik Općine Zavidovići“, broj: 5/2008 i 5a/08, Općinsko vijeće Zavidovići na 40. sjednici održanoj dana 04.12.2019. godine, donijelo je

STATUTARNU ODLUKU o dopunama Statuta Općine Zavidovići

Član 1.

Ovom Odlukom vrše se dopune Statuta Općine Zavidovići, („Službeni glasnik Općine Zavidovići“, broj: 5/2008 i 5a/2008).

Član 2.

U Statutu Općine Zavidovići, iza poglavlja „IX – NEPOSREDNO UČESTVOVANJE GRAĐANA U ODLUČIVANJU I IZJAŠNJAVANJE GRAĐANA O PITANJIMA IZ SAMOUPRAVNOG DJELOKRUGA OPĆINE“, dodaje se novo poglavlje „ - IXa. „ZDRAVSTVENI SAVJET OPĆINE ZAVIDOVIĆI“ i novi članovi 104.a, 104.b, 104.c, 104.d, 104.e i 104.f, koji glase:

„IXa. - ZDRAVSTVENI SAVJET OPĆINE ZAVIDOVIĆI

Član 104.a

Društvena briga za zdravlje na nivou općine Zavidovići obuhvata ocjenjivanje rada zdravstvenih ustanova i kvaliteta zdravstvenih usluga, kao i osiguranje finansijskih sredstava za unapređenje njihovog rada i kvaliteta zdravstvenih usluga u skladu sa potrebama stanovništva i mogućnostima i u skladu sa Zakonom o principima lokalne samouprave u FBiH.

U cilju ostvarivanja društvene brige za zdravlje na nivou Općine osniva se Zdravstveni savjet općine Zavidovići (u daljem tekstu: Zdravstveni savjet).

Član 104.b

Zdravstveni savjet obavlja slijedeće poslove:

- predlaže i evaluira provođenje zdravstvene zaštite na području općine Zavidovići,
- daje mišljenje na planove i programe zdravstvene zaštite za područje općine Zavidovići,
- predlaže mjere za poboljšanje dostupnosti i kvaliteta zdravstvene zaštite,
- prati povrede pojedinačnih prava pacijenata i predlaže poduzimanje mjere za zaštitu i unapređenje prava pacijenata na području općine Zavidovići,
- prati primjenu propisa na području općine Zavidovići koji se odnose na zaštitu prava i interesa pacijenata,
- podnosi Općinskom vijeću godišnji izvještaj o svom radu,
- te obavlja i druge poslove i zadatke u skladu sa Zakonom o pravima, obavezama i odgovornostima pacijenata i Zakonom o zdravstvenoj zaštiti.

Član 104.c

Zdravstveni savjet ima predsjednika i dvanaest članova i čine ga:

- predstavnik Općine (jedan član),
- predstavnik registriranih udruženja koja se bave zaštitom i pravima pacijenata (dva člana),
- predstavnik pacijenata sa područja lokalne zajednice (jedan član),
- predstavnik zdravstvene ustanove Dom zdravlja Zavidovići (jedan član),
- predstavnik zdravstvenih radnika iz reda privatnih praksi sa područja Općine (jedan član),
- predstavnik zdravstvenih komora sa područja Ze-do kantona sa područja lokalne zajednice (dva člana),
- predstavnik Crvenog križa / krsta sa područja lokalne zajednice (jedan član),
- predstavnik Udruženja penzionera (jedan član),
- predstavnik mladih sa područja lokalne zajednice (jedan član),
- predstavnik udruženja žena iz registriranog udruženja žena sa područja lokalne zajednice (jedan član),
- predstavnik zdravstvenih sindikata (jedan član).

Član 104.d

Zdravstveni savjet imenuje Općinski načelnik na osnovu javnog poziva, na period od 4 (četiri) godine.

Kandidat za člana Zdravstvenog savjeta treba da ispunjava slijedeće uslove:

- da je punoljetan državljanin Bosne i Hercegovine (dokaz o državljanstvu ne starije od šest mjeseci),

- da ima minimalno tri godine iskustva u instituciji, ustanovi, udruženju, nevladinoj organizaciji ili zdravstvenom sindikatu ispred kojeg se kandiduje (dokaz: potvrda izdata od strane institucije, ustanove, udruženja, nevladine organizacije, sindikata), izuzev kandidata za predstavnika pacijenata sa područja lokalne zajednice i predstavnika mladih sa područja lokalne zajednice,

- da uživa ugled i ima evidentne rezultate rada u oblasti u kojoj djeluje (dokaz: potvrda izdata od strane institucije, ustanove, udruženja, nevladine organizacije, sindikata),

- da ima prebivalište na području općine Zavidovići (dokaz: obrazac o prijavi prebivališta),

- da nije stariji od 35 godina – samo za predstavnika mladih sa područja Općine (dokaz: izvod iz matične knjige rođenih).

Prilikom imenovanja članova Zdravstvenog savjeta poštivat će se princip ravnopravne zastupljenosti oba pola.

Zdravstveni savjet ima pravo na naknadu za svoj rad u skladu sa odlukom Općinskog načelnika.

Član 104.e

Zdravstveni savjet donosi Poslovnik o svom radu kojim se pobliže uređuje organizacija i način rada.

Član 104.f

Koordinaciju rada Zdravstvenog savjeta, pružanje stručnih i tehničkih pomoći u radu Zdravstvenog savjeta vršit će Služba za upravu društvenih djelatnosti i opću upravu.

Član 3.

Ova Odluka stupa na snagu prvog narednog dana od dana objavljivanja u „Službenom glasniku Općine Zavidovići“.

(M.P.)

**PREDSJEDAVAJUĆI
OPĆINSKOG VIJEĆA**
Redžo Seferović, s.r.